



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim




tir yimyim

TAPAK 8

DNA test ajanga taoba Gujarat CM
Rupani tasumang jangjaogo

Tottenham Hotspur nung
Mathys Tel denogo



VOL. XXII ISSUE NO. 242 (ADOK 242)

DIMAPUR

TENTONÜ (MONDAY)

AAMI (JUNE) 16, 2025

₹ 5.00

Ahmedabad tayimtsü lendong nung asür 47 jangjatetogo

Ahmedabad, Aami/June 15 (Agencies): London-i aodang Ahmedabad nung Air India tayimtsü tsükokba nung asür nisung 47 jangjatetogo, ta ketdangsür temi Deobarnü ashi.

Ketdangsür temi mangyima aliba kinunger nem tasumang 24 agütsüogo ta ashi.

June 12, 2025 nü lendong nung nisung temang aika majiteti rongdok mesüra kangasa mejungi raksar liasü. Iba yongji asürtem jangjatsü asoshi DNA analysis agütsüa akum.

"Tang tashinung DNA matching ajanga tayimtsü tsükokba nung asür nisung 47 jangjatetogo. Item rongnung tasumang 24 pei kinunger nem agütsüogo. Parnok ya Rajasthan aser Gujarat tesem balala nungi liasü," ta Additional Civil Superintendent Rajnish Patel-i ashi.

Passenger aser tayimtsü ketdangsür 242 mena aliba Boeing 787-8 (AI171) ya Sardar Vallabhbhai Patel International Airport nungi Brehostibar nikongdang ayamesor mapang tatsüka tsüngta 1:39 ako nung

Meghaninagar, Ahmedabad nung medical college ka indang campus nung oa tsükoka liasü. Iba tayimtsü nung nisung 242 mena aliba nungi nisung 241 asü aser ali nung alir MBBS azünger pongu densema nisung 29 asü.

Kasa mapang taoba Gujarat Chief minister Vijay Rupani tasumang ya Hombarne par kinunger nem agütsütsü, ta Gujarat Health Minister Hrishikesh Patel-i

metetdaksüogo. Pa den asüpila sentong ya asüing nikongdang 5:00 ako nung Rajkot nung agütsü.

Gujarat sorkari taoba CM nem akhum agüja anogo ka mangyimtsü sangdongogo.

Ahmedabad nung Air India tayimtsü tsükokdak nungi ngutetba den pa indang DNA putepba sülen Rupani asüba ya jangja. DNA osang ya Deobarnep 11:10 ako nung aru, ta state home minister Harsh Sanghavi-i ashi.

Arishi küm 68 tain Vijay Rupani ya Gujarat indang CM ka ama August 2016 nungi September 2021 tashi inyaka liasü.

Census 2025 atemasorkar renemshir



New Delhi, Aami/June 15 (Agencies): India nung Census tenzüksü atema renemshiba asadangtsü atema Union Home Minister Amit Shah-i Deobarnü New Delhi nung sorkar ketdangsür den senden ka mena liasü.

Census agütsü atema sangdong ya June 16 official gazette nung adoktsü, ta Home Ministry sangdong ajanga ashi.

Census 2025 atema renemshiba asadanga senden nung Shah den Union Home Secretary, Registrar General, Census Commissioner of India aser danga ketdangsürtem dena liasü.

Taküm Census ya 16 buba aser India nung nüchiso ngur ti buba alütsü aser noklem ana lemsar agütsü sentong lir.

Houselisting Operation (HLO) nung nisung aliba ki, rongsen aser kidang aliba osettsüset asadangtsü aser Population Enumeration (PE) nung nisung shia indang demographic, socio-economic, cultural aser danga nüngdakba bendentsü aser yangji caste enumeration adentsü.

Nütsüng yongsük züngdanga mapa inyaksü asoshi enumerator aser supervisors 34 lakh den Census functionaries 1.3 lakh shi yoktsü.

Iba Census ya mobile applications amshia digital yimya nung agütsü aser pei sasa tenüng agütsütsütettsü.

Iba den külemi data bendenba, belentepba aser rizünga ayuba mapang data security asoshi mera tesashi agütsü, ta ashir.

India nung cesus tesüsa agiba ya 2011 Census liasü, koba 1872 sülen national census 15 buba aser nüchiso ngur 7 buba liasü.

Census maparen ya phase ana nung agia liasü - House Listing and Housing Census aser Population Enumeration, aser iba mapang nisung 1.2 billion awajema liasü.

Iba mapang 2001 nungi 2011 tsüngta nütsüng yongsük ainba shilem 17.7, literacy rate shilem 74 aser sex ratio tebur 1000 nung tetsür 943 lir ta bushiteta liasü.

Iba sülen census ya 2021 nung agütsü liasü, saka COVID-19 pandemic ajanga menudaktsü aser tangatema official population data tassenbaji 2011 Census ya amshir.

Naga nunger akhi osettem England nungi meyipa bener arutsü



Akhi Naga nunger mang aser tejen osettem England nungi meyipa bener arutsü asoshi UK semdang meyiba arudang tangokba Naga nunger lenirtem noksa nung angur.

Dimapur, Aami/June 15 (TYO): Naga kin balala nungi lenirtem, yimtsü-yimbo, Forum for Naga Reconciliation (FNR) züngsemtem aser Recover, Restore and Decolonise (RRaD) team nungi temeyoktep telok ka University of Oxford, UK nung aliba Pitt Rivers Museum (PRM) semdanga hopta ka munger Deobarnü Nagaland tonga aruogo.

Akhidang Naga lima nungi British nungertemi bener aoba akhi Naga nunger mang aser tejen osettem England lima nungi meyipa bener arutsü asoshi parnoki June 8-14, 2025 anogotem iba tesem semdanga liasü.

Dimapur tonga arur osangbener den jembidang, museum nung yua aliba akhi Naga nunger mang aser tejen osettem meyipa bener arutsü nükjidong nung parnok Oxford-i ao, ta RRaD team coordinator Rev. Dr. Ellen Konyak Jamir-i ashi.

Hopta junga yangji oa parnok amungba nung tajangzük liasü aser Naga nunger asoshi tongtipang mapang ka liaüs, ta lai ashi.

Pitt Rivers Museum ajanga jembishinüa item oset bener arutsü atema külemi teka amteper inyaksü asoshi jaokba aser lisopur den yariteptsü mulunga aliba asoshi lai pelaba lemsatapa liasü aser Department of Art and

Culture, Nagaland teyari nung parnok orr aruba asoshia tenüngsang agütsü.

Bendang lima 'museum'-tem nung Naga nunger akhi mang aser tejen osettem yua alibatam Naga limai meyipa bener arutsü asoshi külemi longjemer inyaksü ta parnoki taoba mapang metetdakja liasü. Iba sangdong dang ya parnoki "Naga Oxford Declaration on Repatriation" ta ajar.

"Onok tetsü teboutemi ola madoki pei nübortem asoshi kuli agüja sangdonga ataba asoshi pelar," ta kasa sangdong nung Naga nunger tsürabur tejen osettem ajanga Naga nunger tanela taküm aser sobaliba otsütem jangjashidaktsüba mapa asoshi pelaba olen ka metetdakja liasü.

"Mapang talangka onoki nenok mebushii toktsüba asoshi jashia bilemer saka tang onoki nenok bener aruba limai tanaben meyipa bener aotsü tenzüker. Iba Museum nungi onoki nenok asen limai bener aotsü telemtetba agiogo," ta parnokisa metetdaksü.

Iba ama Naga nunger akhi tsüraburtem mang aser osettem bushia pei limai meyipa bener aruba ajanga Naga nunger mulungjangtemyirua aliba aneptsü aser telongjem nung kati ka akhümtsübutepa alütsü asoshi tenzüker mapa ka asütsü ta kasa

sangdong nungsa shia liasü.

"Alima tesem balala nung onok ama lisopurtem shirnoksa pei akhi tsüraburtem mang aser osettem bushia pei limai meyipa bener aotsü asoshi inyaker, parnok dena kasa tangatetba lemsateper, kechiyong iba ama mapa yagi asenok tangar kübok aliba shisatsü agiener aser mapatem shitak küma tesünep agütsür, " ta parnokisa ashi.

"Naga nungertem tangatetba nung ka kümer, telongjem nung nenok akhüm keta anisüngzükdaktsütsü asoshi putu ajaki züngshitsüsa Naga nunger taneptsü aser tesünep anguba Nüngshilong ka yanglutsü, iba jagi Naga nunger ajak ya ka danga ta asüba kuli agütsütsü," ta parnokisa metetdaksüogo.

Iba sangdong nung tenüng agüja alirtemji Angami Public Organisation (APO) tir Wb.Thejao Vihienuo, Ao Senden Tongror Luden nung züngsem W b . K . B e n d a n g t o s h i , Khamniungan Tribal Council nung Executive mendenbuba Wb.Talamong Khamniungan, Konyak Union nungi Wb. A.Peihwang Wangsa, Phom Peoples' Council nungi tatong tir Wb. Thamlong Phom, Tangkhul Naga Long nungi Tatong tir Jollyson Ronra Shimray, Sumi Hoho tir Dr.Vihuto Asumi aser FNR nungi Dr.P.Ngullie nungertem lir.

PM Modi-i linük asem sema jajaba Congress-i aitsür

New Delhi, Aami/June 15 (Agencies): Ato Kilonser Narendra Modi tang linük asem sema senzüba Congress party-i Deobarnü aitsü aser Manipur nung tang mepetmesü aliba senzüka yutsür bendang lima sema senzütsü jangraba asüngdanga liasü.

Ato kilonseri Manipur senzüka yutsüba ya tesümgangtsüka lir aser May 2023 nungi tenzüka tang tashinung pa bendang limai 35 ben buba aor, ta Opposition ajanga ashi.

Congress general secretary in charge of communications, Jairam Ramesh-i social media X nung party tebilemba lemsatapa liasü.

"Ato kilonser tanep Cyprus, Canada aser Croatia linüktem semdangi ogo. Mapang ka pai algebra nung pa shisa akaba indang asükuma India aser

Canada nung (a+b)^2 equation indang jemb. Ajisüaka iba sülen kanga mejungi akum," ta Ramesh-i ashi.

Mezüngbo G7 Summit nung India jaoktsü Canada-i memulunger ama sayuba aser Ato Kilonser Modi-i taoba mapang jaok yonga maotsü ta ashiba tang temai adoker, ta Ramesh-i ashi.

India ya alima nung 5th largest economy asüba yong Canada Ato Kilonser-i India den danga non-G7 linüktem G7 Summit-i jaok, ta pai ashi.

Canada ato kilonser dang Niti Aayog CEO ajanga May 24, 2025 nü India ya alima nung 3rd largest economy kumogo ta ashiba PM Modi-i shinüa alütsü akok, ta Ramesh-i anemsü agi ashi.

"May 2023 nungi tenzüka ibai Modi asoshi bendang limai 35 ben

buba aor alütsü. Iba ama semdanga jajatsü asoshi pa dak 'energy, excitement aser enthusiasm' - 3 Es ajak lir. Saka tazüokba makai timtema, kangshia aliba nüburtem semdangtsü asoshi Manipur-i odangtsü asü?" ta Ramesh-i asüngdang.

Ato kilonseri May 3, 2023 nungi tenzüka yimten yimsüsürtem yutsür iba state nungi nisung shinga majuruba atema pai aitsü.

PM Modi-i Manipur mesemdanga aser mapa kecha meinyaker ta angateta Congress-i tanen makai aija arur, kong Imphal Valley nung aliba Meitei aser anasa tenemlen aliba Kuki-Zo teloktem tsüngta May 2023 nungi azüdokshia arur. Iba mapetmesü nung nisung 220 dak tema takum laluogo aser meyirijang aika pei ki yutsür tesem balala nung jenoka alir.

Mokokchung DLSA ajanga awareness sentong ayongzük



Dimapur, Aami/June 15 (TYO): Mokokchung District Legal Services Authority ajanga June 14, 2025 nü Department of Legal Metrology and Consumer Protection, Mokokchung den lungjemer Town Hall, Mokokchung nung Consumer Protection Act, 2019 indang awareness sentong ka ayongzuka liasü.

Consumer temeden, Consumer Protection Act 2019 indang ozüng, e-commerce densema metokmeperi mapang yariteptsüba indang nüburtem angateddaksütsü nükjidong nung iba sentong ya ayongzuka liasü.

Sentong nung Julian Sitlhou, Chief Judicial Magistrate cum

Secretary, Mokokchung District Legal Services Authority ajanga Consumer Protection Act, 2019 kübok "consumer" aser Act nung tongtipang provision tem tejangja rateta ashi.

Lai legal framework rateta ashi aser tim masüba yimya amshiba nungi consumer tem kumzuka ayuba aser service agütsür aser business inyaker temi ochishia inyakdaksütsü nükjidong lemsatepa liasü.

Iba sülen Bendangsenla, Consumer Member ajanga Act kübok shia aliba consumer rights aser Consumer Forum ajanga mangatettep bentettsü asoshi mera balala agiba indang lemsatepa liasü.

E-commerce zünba aser online consumer kumzuka ayutsü asoshi inyakyim balala aliba indang lai rateta shia liasü.

Maneni Consumer Protection Act, 2019 asangsang nung amshiba indang video presentation ka agüja shisalen sayur temi jembiba tali jangjashija liasü.

Maneni sentong nung shilem agirtemi shisalen sayurtem den complaints agütsüba aser e-commerce nung timtem indang asüngdanga liasü.

Sentong nung Temjenkokla, PL, MDLSA menden liasü aser Er. Noksangyuba Pongen, Legal Metrology Officer ajanga melepzüng o jembia liasü.

Manipur nung Meitei aser Kuki nung yimdaklirtem mangatettep adok

Imphal, Aami/June 15 (Agencies): Manipur nung Imphal East district kübok Sadu Lampak yimtsüng anasa Deobarnü alu dak sendakba nung Meitei aser Kuki nung yimdaklirtem mangatettep adoka liasü.

Iba mangatettep ya anepdang 10 ako shi nung Sadu Lampak yimtsüng anasa Kuki nung aliba tesem nung tzülü ka nung adoka liasü.

Sources temi ashiba agi, Leitanpokpi (Sagolmang police station, Khundrakpam AC kübok) nungi Meitei nung aluyimer kati tractor ka amshia alu ya altsü meranga liasü. Iba mapang Kuki nung yimdaklirtemi pa ali kibur asü masü ta ashishi aser iba ya parnok ali ta shia liasü.

Osang ajanga ashiba agi, Kuki nung yimdaklirtemi iba

alu ya parnok meyong ta ashi aser kasa mapang nung Meitei nung yimdaklirtemi ashiba agi, Sopheng nungi Kuki nungertemi iba ali ya atsüng aser Meitei nung indang tzülü sangam 20 (approximately 12.4 acres) shi nung alu ayim tenzüik.

2023 küm May 3 nü kin ana tsüngda mangatettep tenzüikba sülen iba alu ya meyimi liasü.

Meitei nungertem temeket nungi adenshiba sülen tensa tamajungba aküm aser mangatettep adokba mapang Meitei nung lanur ka lijak agi nüksemo yiruja liasü.

Osang ajangasa, Kuki nungertemi Meitei nung aluyimertem ya iba alu nung inyaksangshi masütsü atema nokdanga liasü ta ashi aser iba ajanga ano kin ana tsüngda aziutokshi lendong tenzüikshitsü ta tsübua bilemer.

Iba tatalokba sülen Leitanpokpi police station nungi sepaitem densema BSF, aser Assam Rifles ta security forces tem iba tesemi aritepa ao aser tensa aziüoka liasü. Security force temisa lokti senshidaksütsü atema tear gas shells aser mock bomb tem poklokja liasü.

Kasa mapang nung Manipur Police-i, Imphal East Additional SP-i anir police team tem aser central paramilitary personnel tem iba tesemi yokogo, ta ashi.

Ketdangsürtemi nüburtem dang süngjemshia alitsü aser olulu osang aser osang teyazütem sentoka toktsütsü mepeshiba den tensa aziüoka lir ta shiogo.

Manipur Police sangdong ajangsa, "Security Forces temi tensa kanga junga asadangdar aser tangabo tensa kanga junga aziüoka lir," ta ashi.

Assam Rifles temi Athibung nung Father's Day amung



Dimapur, Aami/June 15 (TYO): Assam Rifles temi Peren district kübok Athibung nung alirtem den lungjemer iba yimtsüng nung aliba tekülem kidang June 15, 2025 nü Father's Day munga liasü.

Sentong nung yimdaklirtem tejangraba tulu nung arua shilem agia iba ama sentong nung Assam Rifles temi densemba asoshi pelaba lemsatepa liasü.

Iba sentong ya ajanga sepai

aser nüburtem tsüngta tesendaktep nung tashi itshia Assam Rifles temi nüburtem den tesendaktep tajung nung alitsü merangba sayur. Iba sentong nung arogo nem nüngdakba oset agüja liasü.

DPC aser KPC ajanga Imna Longchar asükhü lemsatep

Dimapur, Aami/June 15 (TYO): Osangbener tejen aser club züngsem Imna Longchar ajungbena Dimapur nung June 14, 2025 nü asüba atema mang ayimer, ta Dimapur Press Club (DPC) sangdong ka ajanga ashi.

Asür Imna Longchar ya Nagaland Post aser Nagaland Today nung inyaka aru aser pa asüba mapang The Frontier Manipur nung inyaka liasü.

Pai aiben ola madokteter asoshi jembija osang bena liasü. Pai temulungtetba, ajemalu aser pei mapa kanga junga angateta inyak. Pa dak telemla, temeim aketba aser anük-asa den asayamenü jakla tem onoki bilemtettsü, ta sangdong ajanga ashi.

Pa asüba ajanga ozü mulungjang nung tazüngla tuluka yutsür. Onoki akumtsüboa aliba külem tenzüiker asüba asoshi onoki mang ayimer aser par kibong, tembar aser kinungertem

den asükhü lemsateper. Pa tanüla tesunpe nung anisüngzüikjang ta sarasademtsür, ta DPC sangdong ajanga ashi.

Dimapur nung Imna Longchar anojungi par kidang June 14, 2025 nü asüba osang angashia aoksar aser jashir, ta Kohima Press Club (KPC) sangdong ka ajanga ashi.

Dimapur Press Club züngsem Imna Longchar ya Imphal nung amenoka aliba The Frontier Manipur nung correspondent ka ama inyaka liasü.

KPC ajanga mangyimer kibong den asükhü lemsateper aser külem osangbener asüba asoshi mang ayimer, shiba takum bendanga agütsür osangbener mapa inyaka liasü.

Kinunger nem tesuneptsüba, tashi aser anisüngzüik agüjang ta sarasademtsür aser pa tanüla teti tatem maka tesunep nung anisüngzüikjang, ta KPC sangdong ajanga ashi.

Auyaba Assam dumper truck ka Kohima Police-i apu



Dimapur, Aami/June 15 (TYO): Chiephobozou Police Station nung aliab Kohima Police temi June 15, 2025 nü takok ngua dumper truck ka apu. Iba Truck ya Assam nungi auyaba liasü. Itdangiter osang nung ajemdaker police temi kanga kumdanga mera agia iba gari ya soita liasü.

Auyaba gari anisang ya pua

osang agiteper Assam Police nem agütsüogo.

Iba gari putetba ajanga Chiephobozou Police Station nung aliba police tem saksalema aliba tali jangjatsür aser arütsü alema mapa tamajung inyakba aziüoktsü asoshi Kohima Police aser Assam Police tsüngta amalitep akaba sayur.

Longkak aitertem aser yimden yimsüsürtem mangatettep adok

Kokrajhar, Aami/June 15 (Agencies): Honibarnü Parbatjhora Forest Division kübok Paglijhora Protected Reserved Forest (PRF) temeket nung alirtem aser local yimden yimsüsürtem tsüngda mangatettep adokba sülen Assam kübok Kokrajhar district nung tensa mejungi küma liasü.

Adani power plant atema agütsüba ali asadanger asütsü ta temulung melemba sülen mangatettep adoka liasü.

Taoba anogo pezü tashi Paglijhora nungi tetsür aser teburtemi thermal plant atema Adani group nem ali lezmzüksüba asoshi kanga sashia longka aita arudar.

Parnoki Gauripur-Banshbari PWD lenmang nokdanga yur longkak aita ajanga gari senzusenpong nung tetsükdaksü adoka liasü.

Assam sorkar aser Bodoland Territorial Region (BTR) administration-i "Advantage Assam" inyakyim ajanga Banshbari-Paglijhora tesem nung thermal power project ka atema Adani Group nem ali biga 3,400 agütsütsü telemteba agiba sülen mangatettep ya tenzüika liasü.

Ajisüaka iba ali nunga tribal lokti noklang aika lir. Parnoki

ashiba agi, parnok iba ali nung joko aso aika aluyima alir aser parnok liyonga aotsü atema ajak agi iba ali ya dang.

Iba tesem nung alirtemi parnok kanga mepelaba lemsatepogo aser ashiba agi, BTR sorkari iba tesem nung alirtem den sensak asemtsü atema kecha jenjang magi. Iba tesem nung aliba nüburtem ya timba below the poverty line nung aliba tribal tem lir.

Longkak aitertem ya Boro Sahitya Sabha aser Tribal Sangh nungeria pusemogo. Item telok nungi lenirtemi parnok longkak aita tesem semdang aser sorkar dang tensa tangsa tang asadangtsü aser Adani Group nem ali agütsütsü aliba ya sota atatsü mepeshia metetdaksüogo. Tribal Sangh lenir Niranjan Brahma-i, longkak aitertem ochi obendang ka atema raradar ta ashiba den parnoki Tribal Associations aser Boro Sahitya Sabha nem maneni teyari agütsütsü, ta shisem.

Maneni Brahma-i sorkar dang longkak aitertem timtem angateta tanga telemteba ka agütsü mepeshia metetdaksüogo. Tensa maneni mejungi lir, kechiyong local temi parnok ali aser taküm liyonga asoshi maneni raratsü nangzüiker lir.

Kedarnath nung helicopter tsükokba lendong nung nisung 7 asü



June 15, 2025 nü Kedarnath anasa helicopter tsükokba tesem noksa nung angur.

New Delhi, Aami/June 15 (Agencies): Amongnü anepdang Uttarakhand state kübok Kedarnath anasa Gaurikund arem nung helicopter ka tsükokba lendong nung pilot densema nisung tenetprongla süogo, ta ketdangsertemi metetdaksü.

Osangbener den jembidang Rudraprayag District Disaster Management Officer, Nandan Singh Rajwar-i, tsüingsang-mopung majungba ajanga Gaurikund arem nung helicopter ji tsükok, ta metetdaksü.

Iba lendong nung arrshi küm 2 tanur ka densema temeshi aini aoer nisung pongu, pilot ka aser Badrinath-Kedarnath temple committee nung inyaker ka asü.

Anogo ishika tejaklen Ahmedabad nung Air India tayimtsü tsükokba lendong nung tayimtsü nung mena alir nisung 241 asü aser ali nung alirtema aika süogo.

Osang angazükba agi, Amongnü anepdang 5:30 ako meta helicopter ji Kedarnath nungi Guptkashi-i apusoba liasü, ajisüaka mapang tatsüka

tsüingda tsükok.

Helicopter tsükokba tesemji Gaurikund nungi kilometer 5 shi temalen lir, aser iba tesem dangji Gauri Mai Khark ta ajar. Rajwar-isa, tsüingsang-mopung majungba agi tenük agi junga mengui tsükok asütsüa akok; iba lendong atalokba sülen kümzükba mapa inyaker team kar iba tesem jagi yok, ta ashi.

Osangbenertem den jembidang District Tourism Development Officer aser Heli Service atema Nodal officer, Rahul Chaubey-i, helicopter samaba osang metetdaksüba sülen idangyongjisa bushiba maparen tenzüka liasü, ta metetdaksü.

Helicopter ji Aryan Aviation Pvt Ltd indang lir. Gaurikund aser Trijuginarayan tsüingda helicopter tsükokba sülen helicopter nungjagi mi adoka liasü. Iba lendong nung asürtemji Maharashtra, Gujarat, Uttarakhand aser Uttar Pradesh state tem nungi lir.

Uttarakhand Chief Minister Pushkar Singh Dhami-i X

ajanga, State Disaster Response Force den tanga agency temi kümzükba maparen inyakdar, ta metetdaksü.

Chief minister-isa, state nung helicopter service atema SOP (Standard Operating Procedure) ka renemtsüla aser helicopter mapusodang tsüingsang-mopung tama asadangsüla, ta metetdaksü.

State chief secretary dang SOP renemtsü atema technical tsütsü mongintem shima committee ka tentettsü tuyuogo.

Chief minister-isa tesüiba ita ka tsüingda state nung helicopter tsükokba tatalokbatem ajak bushisüingdangtsü atema high-level committee ka tentettsü aser report renema agütsütsü atema tetuyuba agütsüogo.

Uttarakhand nung May 8 nüa Gangotri Dham-i apusoba helicopter ka Uttarkashi district nung tsükokba lendong nung nisung 6 asü aser June 7 nüa Kedarnath-i apusoba helicopter ka tsükokba lendong nung pilot yirua liasü.

DNA test ajanga taoba Gujarat CM Rupani tasü mang jangjaogo

New Delhi, June 15 (Agencies): DNA samples tendangba ajanga taoba mapang Gujarat nung Chief Minister, Vijay Rupani tasü mang jangjaogo; DNA ji par kibong züngsemtem den kasa lir ta jangjaogo," ta Gujarat Minister of State for Home, Harsh Sanghvi-i osangbenertem nem metetdaksü.

June 12 nü Ahmedabad nung Air India tayimtsü ka tsükokba lendong nung Vijay Rupani

densema nisung 241 asü.

"Tanü 11:10 ako nung taoba mapang Gujarat chief minister Vijay Rupani indang DNA samples ji par kibong züngsemtem den kasa lir ta jangjaogo," ta Gujarat Minister of State for Home, Harsh Sanghvi-i osangbenertem nem metetdaksü.

"Chief Minister Bhupendra Patel-i Rupani'er kibong

züngsemtem ajurua Rupani indang DNA samples jangjaba osangji metetdaksü," ta state Health Minister Rushikesh Patel-i ashi.

June 12 nü Ahmedabad nungi London-i apusoba tayimtsüji apusoli minute ka tsüingda Sardar Vallabhbhai Patel International Airport anasa aliba Medical College indang campus nung tsükoka liasü.



June 15, 2025 nü Kerala kübok Kollam district nung 'Ochira Kali' benjung amongdang tangokba noksa nung angur.

Gaza bangzüng nung shilem magiba atema Congress-i sorkar aitsür

New Delhi, Aami/June 15 (Agencies): Gaza nung rara anentsü atema Brihostibarnü UN General Assembly nung bangzüng ka renema vote agütsütepba nung India-i shilem magiba atema Congress-i sorkar sashia aitsüogo.

Tamalen-a Congress-i Gaza nung rara anentsü atema tayongzükba agüja liasü.

Congress Tir, Mallikarjun Kharge-i X ajanga, " Hamas-i Israel nung nüburtem amakba atema October 8, 2023 nü Indian National Congress-i aija liasü," ta metetdaksü.

Rajya Sabha nung Opposition lenir Kharge-isa, external affairs minister S. Jaishankar-i aiben aibelenba atema Ato kilonser Narendra Modi-i pa dang tasüingdangba akatsüla, ta ashi.

"India-i West Asia nung rara anentsü, yimjung alitsü aser ken

o jembitsü atema jembir, ajisüaka tangbo India-i iba tangatetbaji sendoker asü?" ta Kharge-i asüingdang.

Gaza atema bangzüng renema vote agütsütepba nung India-i shilem magibaji taaktsüka lir, ta shia Congress MP Priyanka Gandhi Vadra-ia, "Tang tashi nung tetsür-tanurtem teimba ser nisung 60,000 dak tali tepsetogo, nütsüing aika pua lir aser aya-tzüra tia nung lir, ajisüaka asenoki (India) ibaji anema nokdaksü memelunger," ta metetdaksü.

Laisa, "Alima nung chichiba lenirtemi ochi temeden atema tasü aittsüla. Tesüiba mapangtem nung India-i tasü tait tanela sayuogo. Telemsa kanga adokba lima ka nung asenoki meimchirtem temeden atema ola adoktsüla," ta metetdaksü.

(Maneni tapak 8 nung...)

Pune nung apu chirepba lendong nung nisung 2 asü aser 20 ponger ao



June 15, 2025 nü Pune yimti anasa Kundamala yimdak Indrayani ayong tepdanga yangluba merang apu ka chirepba lendong nung nisung ana asü, nisung trok kümzük, nisung 32 yiru aser nisung 20 tzü agi ponger ogo.

Pune, June 15 (Agencies): Amongnü Maharashtra nung Pune yimti anasa Kundamala yimdak Indrayani ayong tepdanga yangluba merang apu ka chirepba lendong nung nisung ana asü, nisung trok kümzük, nisung 32 yiru aser nisung 20 tzü agi ponger ogo, ta police-i metetdaksü.

Chief Minister Devendra Fadnavis-i, iba lendong atalokba osang angashiba sülen NDRF team kati kümzükba maparen inyakdar, ta metetdaksü.

Iba lendong atalokba mapang apu nungji raliwalir 125 shi nokdaka liasü.

Taoba mapang Cantonment Board Dehu Road nung tatong Tir, Raghuvir Shelar-i, "Iba lendong ya Amongnü nikongdang 4:00 ako meta atalok. Iba apu nungji raliwalir 125 shi nokdaka aliba mapang ajungbena apuji chirep," ta metetdaksü.

Paiza, "Tzü agi nisung 20-25 shi ponger ogo aser iba tesem nungji alirtemi karbo kümzük. Apu jagi nisung 4-5 shi anenbanga liasü," ta metetdaksü.

Chief Minister-i X ajanga, "Mezüng bushisüingdangba

ajanga iba tatalokba nung nisung ana asüba jangjaogo. Tzü agi nisung aika ponger ao, anungji tang parnok tebushidak. Tang tashi nung nisung 6 kümzükogo. Iba lendong nung nisung 32 yiru aser parnok rongnung nisung trokbo kanga mejungi yirur hospital nung treatment agidar," ta metetdaksü.

SANGDONGER

BRANCH OFFICE SHIBANGER

Bajaj Finance Limited indang Registered Office, Mumbai- Pune Road, Akurdi, Pune 411 035 aser corporate office 4th Floor, Bajaj Finserv House, Viman Nagar, Off Pune – Ahmednagar Road, Pune, Maharashtra 411 014 nung aliba ajanga customers aser nübortem dang Bajaj Finance Limited, 3rd Floor, Nemcha Complex, Plot No. 273, Yongpang Market, Arkong Ward, Near State Bank of India, Mokokchung, Nagaland – 798601 nung aliba office 19/09/2025 nungi shibangtsü ta metetdaksü. Customer-tem asoshi nüngdak ajak tajungba anepalutsü asoshi tang inyaka aliba mapa ajak Bajaj Finance Limited, Joshua Commercial Complex, 1st Floor, Plot No- 40, Kezieke, Beside Yes bank, High School Road, Below North Police Station, Kohima, Dist-Kohima, Nagaland-797001 nung belenoker. Anungji, customer-tem aser nüngdakba purtem ajaki iba office tesem melenba osang meteta alitsü mepishir aser tang nungibo yangi tongtepratepangma - Bajaj Finance Limited, Joshua Commercial Complex, 1st Floor, Plot No- 40, Kezieke, Beside Yes bank, High School Road, Below North Police Station, Kohima, Dist-Kohima, Nagaland-797001.

Bajaj Finance Limited

4th Floor, Bajaj Finserv House, Viman Nagar, Off Pune - Ahmednagar Road Pune - 411 014 Maharashtra
Tel - 020 -71505050
Date -16.06.2025



TIR YIMYIM YIMOBILEM (EDITORIAL)

DIMAPUR MONDAY, MAY (AAMI) 16, 2025

Mang bushiba kin

Naga nungertem, talisa asenok Aortemi asensasa asen naroküm indang jembidang, asenok ya mang metokshiba aser mang bushiba kin ta jembir. Tetezü asenok ya asenok rongnung taküm alidang dang masü saka sür külena tasümang kanga junga anepalua endokba kin lir, anungji tongpang nunga külem pur medemer yutsür majener aser taküm sama nunga medemertemi mang bushia bener arua ki tongtsür. Iba jagi asenok tasü aitba sayur. Aji oda, asenok asoshi asenok nisungji takar asü sensaker mesüra tulur aser tilar ta masü, ajak kasa senso tajung, sensaker aliba agi takar alir aser takar aliba agi sensaker alir, ibaji ajaki züngshia akümtsübur, anungji takar tulur asüdang dang masü saka sensaker aser tilar asüdanga kasasa aria bilema mangyima yariteper. Kasaji, takar sensaker kecha mali, kodangsa tia mejungi pei senso rongnung nisung ka danga taküm samaba osang angshidir, yimkong nübodoka mangu tashi bushiteper. Iba jagi, atangji, asenok ya mang bushiba kin-a ta jangjar. Tetezü asenokibo tasümanga dena mezüngmeshi masür. Aji oda, tanü asenok ajak asoshi osang tajung kaji England lima Pitt Rivers Museum, Oxford nung asen Naga nungertem tetsü teboutem mang aser akhi tejen osettem bener oa yua alibatem Naga limai meyipa bener arutsü renemba osang ya asütsü. Oxford University nung aliba Pitt Rivers Museum nung ya alima ajaklen nungi putu tapu balala nung nisungtem lia aruba mapangtem nung bendenba nisung mang aser akhi tejen osettem lakh pungo dak tali yua lir. Item akhi tsüraburtem mang aser osettem ya British nungertemi alima kintem madak ramoka yimsü asüdang kar yimten ketdangsertemi, kar raliwalirtemi aser karbo missionary-temi alima tesem balala nungi bendenba osettem lir. Aji oda, 1884 küm British army nung Lieutenant General Augustus Henry Lane Fox Pitt Rivers-i pa par British yimli kübok alima balala nung alidang bendenba osettem 22,000 Oxford Univeristy nem agütsüba nungi tenzüker, pa naroküm nung iba Pitt Rivers Museum ya tenzüker. Tanüba iba museum ya alima nung akhi otsü metetener, reprangner aser bushinertem asoshi museum-tem rongnung tongtibangtiba museum ka kümogo. Iba ama akhi tejen osettem nübortem asoshi rezünga ayudak tongtibang tesem ka nung asen tsüraburtem mang aser akhi tejen senti osettem yua akabaji asenok asoshi kanga tia tajung ta züngshitsüla, kechiyong parnokika yamaji rezünga meyutsüka asünunga asenokibo asenok ket nung akhi tejen osettem aser tsürabur mang dena rezünga meyutetla. Aji oda, angazükba agi, British nungertemi India nung yimsüsüba mapang Naga lima nungi Naga nungertem mang dak aketba temang shilem 200 shi bener aobatem iba Pitt Rivers Museum nung yua lir. Item mangtemji asen limai bener arutettsüsa lenmang lapoktsübbaji 2020 küm iba Pitt Rivers Museum, Oxford ketdangsertemi yangji yua aliba nisung tasümangtem dak aketba shilemtem aser tanga akhi tejen senti osettem ajak, akhi mapang bener aruba, pei limatem nem meyipa agütsütsü lemtetba ajanga ataloka arur. Item osettemji Museum nung ayuba ajanga item kintem indang tamajung bilemdaktsür ta angatetba ajanga itemji parnokiki pei lima nem meyipa agütsütsü lemtet. Naga nungertem asoshia FNR telok ajanga item Naga nungertem tsüraburtem mangtemji meyipa bener arutsü anepalutetbaji Naga nungertem asoshi mapa tajung tuluka inyaktür asütsü. Atangji, Pitt Museum, Oxford nung aliba mangtemji Naga nungertem koba kintem nungiar asenokibo mejangjatettsüa akok saka asen tetsü tebou teret aser asen tsüraburtemi amshiba akhi tejen osettem bendang lima nung küm aika yua aliba meyipa bener arua asen lima nung tesem ka nung Nüngo küma ayutsübbaji asenok asoshi temoatsü mapang ka tenzüker asütsü. Item tsüraburtemji meyipa arudang asenok akümlir Naga nungertem longjema, kibong ka chir ama, ali tenzüksübbaji Naga nungertem ajaki yongyaba anogo ka asütsü. Tanü asenoki akümlirtemi jembiba magizüktetyonga, asen tsüraburtem teret nungi angashiba ola jagi asenok longjemdaktsütsü merangtsüla.

OLEMSABANG

Kibong yangerba nung tebudi shilem

~ L. Kika Pongener.

(Yashi adok nungi...)

Ano Noah par putu nung Tsüngremi temulung achitsüsa aser tamang katettsüsa, temenen nungi pila-a litetba nisung ka liasü. Noah nungertem aliba putu tensa nung, alimaji kanga dang tesempatsü, memeruk aser memeshi agi sunga liasü. Ajisuaka, iba ama putu tensa ka nungjia, Noah Tsüngrem mulong achitsüsa asüngteta, meshiteta aliba tebudi ka liasü. Noah-i Tsüngremi ashiba anga-a 'Rong' yangluba ajanga par kibong nung alir ajunga Tzümet süng lendong nungi kümzüker. Noah taküm nungi lesson ka angubaji, kibong rangben kümzüksüsa asa-meyangtetba tebudi ka Noah liasü.

Ano tejen lai nungjisa züngdangra, Eli Putir-i tebudi ka ama par chirnur mazüoktet, par jabaso Hobni aser Finehas, tenati tenladak sabangi tenla bener aruba chiyungtsü rakzüka achi aser tenladak sabang nung inyaker tetsürtem den nukdapangta benshi. Ajisuaka, Eli putir-i par jabaso ana mazüoki pei sunutsü sudaktsü. Eli Putir ya kibong nung tebudi ka teinyaktsü tim meinyaki tamakok anguba tebudi ka liasü. Eli putir taküm nungi, tebudi kati pei teinyaktsü tim meinyaktet, chirnur mazüoktet, pei mapa nung tamakok anguba indang lesson angur.

Ano tejen lai nungjisa züngra, Dawid chubai par sepoy Het nungertem Uria tongpang nung tepsetdaktsür, pa kinungtsü Bathsheba rakzüka agi. Anungji iba temenen taa, Dawid'er kibong nung par jabaso Amnon-i pei tenu Tamar den nukdapangta benshi, aser iba mechi Absolom-i tenu Amnon tepset. Dawid-i par sepoy Uria tepset, saka par kibong nungbo tedi-i tenu tepset. Dawid-i Uria kinungtsü rakzüka agi, saka par kibong nung adianu-aianu den nukdapangta benshi maaksutsü mapa tuluka atalok. Dawid taküm nungi tebudi kati nukdapangta aser japojaru mazüoktet tangar kibong raksatsüba aser tai maketba nisung taküm tepsetba ajanga kibong dangi atakadem bener aruba lesson tamajung ka angur.

Tanü putu nunga, Eli putir ama tebudi kati pei teinyaktsü tim meinyaktetba aser pei chirnur timyimi mazüoki pei sunutsü sudaktsüba tebu aika lir. Ibajagi kibong nung tebilemstü khuret tulu bentsür arua kibong aika molumi tia nung lir. Kibong karbo kaa-ita jenjang tajung nung lia aliba, chirnur timi mazüoktetba ajanga, chirnur-i bentsür aruba khuret agi kibong temeimtsüka timtema lir. Ano Dawid chuba ama pei sasa tebu ka akümüket jenjang mezüngmeshiba tebutem aika lir. Tesasatsüka, tanü tebu aika pei sasa 'Oba' ta ajaba jenjang mezüngmeshia, yi lar/mozü lar kümer taküm lisaba, lottery aser Dash asayaba nung rongsen aser mapang ajak endokba, nukdapangta japojaru nung rongsen aser mapang endokba, chirnur atema khuret abentsü melena, meyiper chirnur nem-ang khuret agütsüba tebutem karbo lir. Tebudi kati pei chirnur den tesendaktep mali, sayu-bentsü maka, sensaksem mali, sayu-bentsü kecha mekai aliba tebu aika lir. Chirnurtemi tebu ajurutsübbaji Molosongzü aser Kiyi tesashi ka ajurutsü ama tsübuba tebutem aika lir.

Tanü putu nung, osang-tsüsang (Media) balala nung kinungtsür karbo kanga tetla-tetshia/maksudakja, pei kinungburi kinungtsü masütsü...Ni tanü nungi la khuret mabentsü...ta osang kakat nung adokba azünger. Ajisuaka, ibalaji jungjunga bushidanga ora, ajakbo kinungtsü kija tai masü, karbo kinungbu kati pei tim teinyaktsü khuret mabenba, kibong senzüka toktsüba, pei apuani aser chirnur kechi jenjang nung lidar memetet, kinungtsü nem kibong khuret ajunga benzüka toktsüba agi, la kijai kibong achaayanga ketdang asüdang, sentsüh aika attsütsüsa akümba, agi kibong iba tia jagi aiba karbo lir. Ajisuaka, ibalaji kecha meshisadangi, pei kinungtsür mezüngmeshia 'Social Media' balala nung maaksudakja/tetla-tetshia adoktsüba karbo lir. Ashiko, kibong khuretji kinungtsü kija nem shiloka metoktsüi, tebudi aser kinungbu ka ama pei teinyaktsü tim shitak inyak asübo, pei kibong khuret shitak aben asübo, kibongji iba tia jagi maitsüba liasü.

Aji oda, kanga junga shisadangra, tebudi aser kinungbu kati pei khuret mabenba aser makokba ajanga kibong sensak tia-i ayiba karbo lir. Hau-niii...kibong ajakbo taka-taiter masütsü, saka shirnoki azümesen mesui mapa meranga inyaker, chirnur shitak azüoka tim lenmang nung aniteter, rongsen timyimi ketdang asür, parnok-bo kangarabo tim-medemi, pei kibong sasep, peria chiyunga-jema litettsü lenmang sadem-sadema dang lir. Anungji tebudi aser kinungbur ajaki 'Oba' ta ajaba 'Nungja'-ji konang dang masü, khuret tulu ta angateta, pei kibong khuret shitak abentsüla. Koba kibong nung tebudi aser kinungbu kati pei khuret mebentetli, iba kibongji 'Rong' ka rongitsü (Rudder) maliba ajanga 'RONG' tzyim telung nung asongokba ama kibongji aiatai tia-i aitsü. Atangji kibong ka yangerba nung tebu ka shilem aser khuretji kanga dang tulu lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Laishirtemi tang Israel-Iran tensa ya mita alitsüla: Greg Laurie



June 15, 2025: Israeli Air Force-i missiles aika amshia Iran nung nuclear facilities amakba aser Iran-ia missiles amshia Israel amakba sülen Khristan lenirtem aikati tebilemtsü akaba lemsatepba den külemi yimjung atema sarasademtsü ayongzüker.

Israel sepaitemi amakdang Iranian Armed Forces tongti, Islamic Revolutionary Guards Corps commander aser Iran emergency command tongti densema ketdangsertem aika tepsetogo.

"Strength of a Lion" nüngja nung ajemdaker Israel-i Iran sepaitem aser nuclear facilities aika amakba sülen Hokolbarnü Iran-ia missiles aika amshia Israel amak.

Tang iba tensa dak sendakba nung California nung aliba Harvest Christian Fellowship nung pastor, Greg Laurie-i, "Iba ya tebilemtsü onük tuluka lir aser Laishirtemi iba tensa ya jungjunga mita alitsüla," ta metetdaksü.

Pastor Greg Laurie-isa, "Iran sorkari mapang talangka nungi alima tesem balala, talisa Israel anema kiralongraba pusema arudar. Joko tesüiba küm aika parnoki nuclear hadirtem yanglur aser par lenirtemi nuclear amshia alima map nungi Israel samatsütsü ta mapang shia amokmerener," ta metetdaksü.

"Asenoki sarasademtsüla aser Kibuba den jajatsüla. Tang tensa mapang ya lendong agi meketa aliba tensa ka, asenoki tanela jenjang asentenshitsu, tasü aittsüla aser tamang akatsüla," ta paisa metetdaksü.

Gainesville, Georgia nung aliba Free Chapel Arogo nung pastor, Jentezen Franklin-ia X ajanga Israel nungertem pusemba lemsatep.

Franklin-i, "Iran nunger missiles meyirjang aika amokmeren kübok Israel nunger million aikati tejenokdak bushiba mapang nung onoki Israel nunger atema sarasademtsür. Tetsübu, mejangjaba tensa aser lendongbang nung alirtem, talisa tanurtem, Holocaust nungi jenburtem aser yimjung yanglurtem atema onoki sarasademtsür," ta metetdaksü.

Franklin-isa, Israel nung 'prayer cameras' yuogo aser nübурtem dang Yihuda nungertem aser Israel lima atema sarasademtsü mepishir, ta metetdaksü.

International Christian Embassy Jerusalem nungi Dr. Susan Michael-ia, nuclear hadir aliba Iran nokdangtsü atema Israel-i inyakbaji ni pusemer, ta metetdaksü.

Laisa, Iran ket nung nuclear alibaji Israel atema dang masü saka alima nung yimjung aser security atema-a amokmeren lir, ta metetdaksü.

Lai sangdong ka ajanga America nungertem dang Israel nungertem aser sepaitem kümzüksü atema sarasademjang, ta mepishia metetdaksü.

"Israel-i tongbang anogotem atema renemshidar. Tang ama mejangjaba tensa mapang ka nung onoki Laishiba nung nangzüka aliba nung amanger. Tenünsang Ken 121:4 nung 'Israel kümzüka ayusangi amoi maoer mesüra memejanger' ta shia lir," ta laisa metetdaksü.

Christians United for Israel nungi Pastor John Hagee-i sangdong ka ajanga, "Israel-i nuclear aliba Iran nokdangba ajanga alima atema mapa tajung ka inyaksüogo," ta metetdaksü.

San Antonio nung aliba Cornerstone Church nung pastor Hagee-isa, "Israel-i par linük kümzüker, aser Tsüngremi melungba dang süra Iran nung nübурtem atema nüchiso lenmang-a lapoktsütsü," ta metetdaksü.

"Onoki Israel aser yangji aliba nübурtem pusemer. Israel nungertem, nenok kija masü," ta paisa lemsatep.

WeChat nung sayutsüngiba angatsü atema tetuyuba tasen agütsür



June 15, 2025: East China nung aliba Arogo kati parnok indang WeChat public account ajanga, sorkar tetuyuba kübok Khristantemi WeChat ajanga sayutsüngiba onüktem angatsü atema temelaba meshitsü asoshi Arogo indang official website nung tenüng shidakba agütsütsüla, ta metetdaksü.

Sayutsüngiba onük angatsü atema registration agitsü asoshi telatetbatemji mobile phone nung screenshots 13 ben sür reprangtsü nüngdaker.

Tetuyubatem rongnung website lapoktsü, phone number aser password amshia register asütsü, verification codes reprangtsü, amadokba password metettsü aser registration agiba sülen sayutsüngiba 'audio' angatsü indang tejangja shia lir.

Iba Arogo nungji pastor-i, "Iba ya ajanga tamangertem tejangraba samatsütsü, talisa kanga tantsür-tamburtem tejangraba samatsütsü," ta metetdaksü.

Tamanger kanga taintemi tanü-asüng technology junga mamshiteter memetet, anungji parnoki timtem ajangshitsü, ta pastor-isa metetdaksü.

Lanurtemibo melamela amshitettsü saka iba inyakyimji kanga tebenja, ta pai ashi.

Coronavirus wara mapang nungi tenzüka Arogotem aikati tekülem sentongtem online ajanga dang agia liasü. Ajisüaka kanga taintem atemabo phone nung chat group lapoktsü mesüra 'link' lapoktsü atema-a tasak.

Wuhan yimti nung aliba Arogo ka nung lanur pastor kati, "Ozü Arogoibo kodanga 'livestream' masü, kechiyong Arogo nung züngsemtem atema technology amshitsü tasak aser aika ket nung smart phones mali," ta metetdaksü.

ANOGO ABEN TSÜNGREM DEN

Tasü tonga bendanga agütsü

"Kechiyong Yisu taküm onok tasütsüba shi nung jungkai adoktettsü asoshi onok, shir taküm lir, Yisu atema tasüba nem teti bendanga agüja lir...." 2 Korint 4:11-12.

Tasütsüba taküm shia alitsü jangrar, tekümtet asoshi Khrista dangi arur shiai takümji teti taküm Tsüngrem sempet ta shisadanger. Tashi taitiba tekümtet temoatsüji kotak nung Tsüngrem den teti tatem makai tenangzüka; kari ibai kanga tasak, kechiaser iba tenangzüka nungji tamangertem rishikangshi, timtem, aser tasüba dena lir ta shisadanger. Asen Kibuba taküm yimya nung tajung, akanga alir yariba, shisadanger anebtsüba, sensaker nem agütsüba, ochi pu akümba, teyarir malir tenzüka, aser ozüng benshiba ama liasü ta angatettsula. Khristai Pa nütsüngtem dang nangzüka ama, tesempa aser rishikangshi dena asenoki osangtajung denji aremtsüla. Kibuba Yisui Pa pelatsü kecha meinyak saka Tebu peladaktsütsü dang inyak. Pai Pa sentsüwangshi, ain aser tejangraba südaktsü. Asenok dak iba tarakji akettsüla.

Khristaji asen tebu asünung, asenok dak Yisu asüba aser taküm lir. Asenok dak merumeru mali aser tenzüka taküm yimya ngur, nüburi asenok tasüba temang nung Yisu taküm angutsü.

CofE-i osangtajung sangdongba nung sen million 416 indoktsü



June 15, 2025: Church of England (CofE)-i taruba küm senotsü shilem 9 agi tali England (CofE)-i taruba küm lenzüksüogo (pound sen million 416.4) aser iba nungjagi shilem 25 bo sensakertem dak osangtajung sangdongba nung rangloker inyakba nung senotsü indoktsü aser local indoktsü.

Arogotem nung indoktsü atema senotsü asalentong renemogo.

Church of England-i 2029 küm tashi nung pound sen billion 1.6 indoktsü, aser ibaji tang kümsük (küm 3) den medemdangra shilem 36 agi teimba lir.

Arogo nung lenirtem stipends atema senotsü shilem 10.7 agi tali lenzüksüogo. Taoba ita Arogo nung lenirtem pension tutsütsü atema sangdongogo, aser ibaji taruba ita General Synod nung benoka agizüksü.

Church of England-i, tesüiba küm pezü tsüngda Tenla kidangi arurtem kanga renokogo aser ano maneni renoktsü aser local Arogotem asentenshitsu atema inyaktsü, ta metetdaksü.

Taruba küm asem tsüngda mission aser ministry atema senotsü shilem 9 agi tali lenzüksüogo (pound sen million 416.4) aser iba nungjagi shilem 25 bo sensakertem dak rangloker inyakba nung indoktsü.

CofE-isa pound sen million 48.1 agi UK nung aliba Tenla kitem yanglushitsü aser Tenla kitem wazüka ayuba nung sen million 30 indoktsü.

Archbishop of York, Stephen Cottrell-i, "Church of England-i England tesem ajaklen Khrista osangtajung proktsü. Ozü Arogo ya England nung alirtem atema lir aser onok mapatem maneni inyaktsü atema Church Commissioners aser melungsoa tenla agütsürtem meyirjang aika longjemer inyaker," ta metetdaksü.

Paisa, "Senotsü jagi kechisa inyaker, ibaji kanga tongtibang. Arogo nung lenirtem aser züngsemtemji kanga tongtibang. Tongtibangsa nüngdakbapurtem yariba local Arogotem nungita yaritsüji kanga tongtibang," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tenya**

(v) mapa kar atema yokba (send on errand)

* Taini tenya, anungji tanurtemi tashi angaa inyak.

Tenyar

(n) Tsüngremi tenyaba angartem (angel)

* Kotak tenyar kar oa Lot'er kibong kümzük.



Tir Yimyim

OLONG PAITEP # 7183

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang
tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. ___ adenshi - (4)
14. Tsünüsenbongtsü adokdak - (3)

OLONG PAITEP # 7182 TELANGZÜBA**TIPIEN :**

1. Kasa, 6. Rangben, 7. Mait,
9. Poktet, 11. Ati, 13. Atasa,
16. Rür, 17. Rajang, 20. Lanu,
24. Nüngjem, 25. Süra.

LANGTSÜNGLEN :

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Tajü,
21. Ano, 22. Onü, 23. Kua.


NAI-A YA METETTER MA

Midfielder Bekey Oram-i NorthEast United FC den t e n a n g z ü k t e p b a yanglushiogo aser pa iba Indian Super League club nungi 2028 season tatem tashi asayatsü, ta team-i Deobarnü metetdaksü. 2023-24 season nung club nung adenba sülen Bekey ISL, Super Cup, aser Durand Cup nung asaya 18 nung asayaogo.

40buba Sikkim Governor's Gold Cup akoba nung pai club atema tongtimbang shilem agia liasü aser Reliance Foundation Development League (RFDL) nunga kanga junga shilem agiogo.



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Centre-i Tura Bypass atema sen crore 951 agizükogo**Shillong, Aami/June 15**

(Agencies): Central sorkari Meghalaya nung Tura Bypass yanglutsü atema sen crore 951.27 agizükogo, iba ajanga National Highway 127B aser NH-217 na sendakteptsü.

Iba lenmang ya two-lane lenmang ka asütsü aser Tura district ajanga kilometer 29.03 aotsü.

Union Minister for Road Transport and Highways Nitin Gadkari-i, iba project indang osang tejangja lemsatepogo aser iba tesem koda tongtimbang iba indang lemsatepa liasü.

Lenmang tasenba ya NH-127B nung Sanchonggre yimtsüng anasa tenzüksü aser NH-217 nung Jenggitchakgre den sendakteptsü. Iba lenmang

yagi tang amshia aliba lenmang koba ajanga Tura jila adena aoer iba ya paitoka aotsü

NH-217, koba taoba mapang NH-51 liasü, iba ya Guwahati aser Bangladesh den arrtsü nung aliba Dalu jila na tsüngda tongtimbang corridor ka ama inyaksangshir. Iba jila ya inland customs checkpoint ka lir.

Iba bypass yagi Tura jila nung gari mesemi nongtepa aliba paitoktsü aser gari nongtepa nungi jenboa toktsüba den senzusenpongba mapang tajemba kümdaksütsü aser nüburtem tekümzükba kübok toktsütsü.

Ketdangsürtemisa, iba project ajanga khu belenshitsü atema tezübababa kümdaksütsü aser iba tesem tesendaktep tajungba kümdaksütsü imlar.

ONGC well ka nungi gas maneni leak südar**Guwahati, Aami/June 15**

(Agencies): Assam kübok Sivasagar district nung Oil and Natural Gas Corporation's (ONGC) Well No. RDS-147A nungi anogo pezübuba atonga gas maneni leak südar, aser iba ajanga ketdangsürtemi iba tesem temeket nungi kibong 70 shi aninogo.

Gas ya Bhatipar Barichuk anasa Rudrasagar oilfield nung June 12 nü nungi leak asü tenzüka liasü, aser iba ajanga iba tesem nung alirtemi kanga süoki ia bilemer aser yimden yimsüsürtemi ketdangsürtem aija arudar.

Crude oil well tejen ka asüngsashitsü merangba mapang iba ya ataloka liasü.

Iba mapa inyaksü atema ONGC-i private firm SK Petro Services nem contract agüja liasü. Mapa benoka inyaks tenzüka sülen gas ya

mazüokteti leak asü tenzüka aser iba sülen tuluba küma pokteta tugua iba tesem nung mim aketba gas tem chioka liasü.

Director of Technology & Field Services Vikram Saxena-i anir ONGC indang Crisis Management Team (CMT)-i tensa azüoktsü atema Honibarnü iba mapa agizüka liasü. Engineer temi tongtimbang hadirtem bendenogo aser gas leak asüba nembangtsü atema inyak tenzüko. "Onoki tensa kanga junga asadanga atadar aser iba ya azüoktsü atema takaratiba nung inyaksü merangdar," ta ONGC otongdar kati ashi.

Gas leak asüba ajanga mibo madokdaksü aser nisung yiruba osanga kecha mali, saka mim aketba gas chiokba ajanga temeket nung aliba loktitem dang kongshitsü.

Iba dak sendakba nung local ketdangsürtemi iba tesem

temeket nung aliba kibong 70 aninogo aser Bongaon nung refief camp ka amenokogo. Ketdangsürtemi chiyongtsü, medical care aser tejenokdak ajak anepalutsüogo.

"Gas menemba ajanga nüburtem saksünütsü atua mangmanger aser tekolak mener. Nisung aika sorchioka mesüteter, kechiyong mi amshira lendongi aitsü ana nung lir," ta ketdangsür tejen kati ashi.

Health and Animal Husbandry Departments nungi Medical team temi iba tesem nung alirtem aser kisetshirurutem health asadangdar.

Assam Pradesh Congress Committee (APCC) züngsemtemi Deobarnü iba tesem semdangogo aser ONGC-i kanga meyilongi inyaksangshiba aser telangzüba shitak magütsüba atema kanga mepelaba lemsatepogo.

Arunachal: MLA Ninong Ering-i senotsü teyari agütsü**Pasighat, Aami/June 15**

(Agencies): Taoba mapang Union Minister of State (MoS) for Minority Affairs aser 37th Pasighat West constituency indang MLA Ninong Ering-i, pa indang constituency nung IAS akümtsü jangrara asem nem senotsü teyari agütsüogo, shirnok UPSC- Civil Services Preliminary Examination 2025 pass süogo.

MLA Ering den Ruksin ADC Kiran Ningo nati Deobarnü East Siang district ADC office chamber nung sentong tila ka agiba mapang candidate asemprongla nem sen lakh kaka alang incentive agüja liasü.

Rayang yimtsüng nungi Elkanah Modi aser Ruksin nungi Bambom Perme naprongla ya Engineering graduates lir aser tenapronglai tanabenbuba merangdangba mapang tatidang ajangteta liasü.

Kasa mapang nung Mirem yimtsüng nungi Dr Zing Messar, shiba-i IAS (IRS kübok

inyakdar) ajangtetogo saka tanaben agütsüshia liasü, pai UPSC preliminary examination ajangtetogo aser Zing nema MLA's scholarship programme kübok senotsü teyari ya agütsüogo.

MLA Ering-i iba scholarship scheme ya 2019 küm pa indang constituency nungi IAS tatidang agütsütsü jangraratem nem angati coaching aser UPSC (CSE) tatidang atema kaketttem agütsütsü asoshi amenoka liasü. Pai linük nung ajak dang tongtimbangtiba tatidang nung shilem agütsüpur pongu nongita yaridar.

Pasighat JN College nung assistant professor Eruk Libang-i, coordinator ama scholarship programme ya agidar.

IAS programme den MLA Ering-isa, 'meritorious intermediates' tem atema scholarship programme ka sponsor südar aser parnok tatidang (undergraduate) balala



agütsütsü atema teyari agüja arudar.

"Kü kübok aliba tesemtem nungi takok tajung anguba kaketshirtem senotsü nung tetsükdaksü kecha madoki UPSC tatidang agütsüdaksütsü atema iba jenjang agir. IAS officers tem adokdaksütsü atema ni maneni takok tajung anguba kaketshirtem nongita yaritsü, shirnoki taruba putu dang lenmang shitakba sayutettsü," ta MLA Ering-i sentong nung o jembiba mapang ashi.

Russia-i Ukraine army nem totzü agütsüba refinery ka amak

Moscow, Aami/June 15 (Agencies): Russia nunger sepaitemi manger mesangwa tsüngda Kremenchuk oil refinery makogo, koba ajanga Donbas tesem nung Ukraine nunger sepaitem nem totzü agütsür, ta Russia indang defence ministry-i Deobarnü ashi.

Ministry sangdong ajanga ashiba agi, Ukraine kübok Poltava tesem nung amendaker aliba refinery dak anüng aser tzüyim ajanga missile tem khaloktsü aser drone-a amshia liasü. Parnoki ashiba agi iba tesem ya takok ngua makogo.

Russia-i, Ukraine kübok anütoklen aliba Donbas tesem ya parnok meyong ta ashir aser parnoki iba tesem kübok Donetsk aser Luhansk na timba atsünger lir. Donbas nung tanungba tesemtem magidaktsütsü atema Ukraine-i raradar aser ashiba agi, tashiyim aser diplomacy amshia item tesemtem meyipa agitsü sentong lir.

Russia indang Defence Ministry-i tanga sangdong ka ajanga ashiba agi, parnok sepaitemi Donetsk tesem nung Malynivka yimtsüng atsüngogo, koba Russia nung Ulyanovka ta ajar.

Ministry-isa parnok sepaitemi Ukraine kübok Sumy nung tesem aika atsüngaogo aser item tesemtem nung Ukraine nunger unit tem kanga akoksadaktsüogo. Sumy yabo Russia taoba mapang parnok meyong ta shir maliasü, saka iba tesem nung buffer zone ka amenoktsüba indang jembiogo.

Ukraine tir Volodymyr Zelenskiy-i Honibarnü ashiba agi, Ukraine nunger sepaitemi northeastern Sumy nung Andriivka yimtsüng Russia nunger ket nungi meyipa agiogo. Pai ashiba agi, Russia-i iba tesem kümbang nung sepai 53,000 anidena lir.

Deobarnü Ukraine-i, rara nung asüba Ukraine nunger sepai tasü mang 1,200 Russia ket nungi agizükogo.

Tasü mang aser rara nung apurtem melenteptsü atema nangzüktepba nung shilem ka ama iba jenjang ya agiogo.

Linük ana tsüngda tasü mang aika melentepa arudar aser Ukraine-ia tasü mang 4,800 agütsüogo, ta Ukraine nunger ketdangsür kati ashi.

Ajisüaka Russia indang state news agencies TASS aser RIA napronglai tasü mang agütsüba indang metetdaktsü aser ashiba agi, Moscow-i Ukraine nungi tasü mang ka danga magizük.

Kyiv aser Moscow nati tasü mang 6000 aser iba den shirangertem aser kanga mejungi yirur alirtem den arishi küm 25 tekübokpurtem melenteptsü nangzüktepba liasü.

Russia-i ashiba agi, parnoki tang tashi nung Russia nunger sepai 27 tasü mang dang agizüka lir. Ukraine aser Russia na tepuokertem asemben melentepogo, saka kwi melentep iba indang osang tejangja magütsü.

Iran den sensaksemtsü Germany, France & UK renema lir: Johann

Berlin, Aami/June 15 (Agencies): Middle East nung tensa mejungi küma oya aliba süngjemshidaktsütsü atema Tehran indang nuclear programme dak sendakba nung sensak asemtsü atema Germany, France aser Britain renema lir, ta German Foreign Minister Johann Wadephul-i ashi.

Wadephul, shibai tang Middle East semdangba mapang ka lir pai, Israel aser Iran na rara anendaktsütsü atema pai teyari agütsütsü merangdar, ta ashiba den Tehran-i taoba mapang sensaksem atema maongka anguba magi, ta shisem.

"Sensaksem ya katettsü ta amanger," ta Wadephul-i German public broadcaster ARD dang Honibar aonung ashi.

"France aser Britain na den Germany-a renema lir. Onoki nuclear programme dak sendakba nung sensak asemtsü atema Iran nem maongka agütsü aser iba maongka ya

agizüktsü imlar," ta paisa ashi. Wadephul shiba Deobarnü Oman nung liasü, pai ashiba agi, lenla ajak nungi Iran aser Israel naprongla nongshi nung dang rara anentsü.

"Taruba hopta tsüngda rara anendaktsütsü atema linük anaprongla nokdangtsü asoshi süoki ia merangdangtsüla," ta pai ashi.

Iran sorkar chireptsü asü ta asü ngdangba mapang Wadephul-i, Tehran nung administration chirtepdaktsütsü atema Israel tebilemba mali ama nibo bilemer ta langzü.

Maneni Gaza indang jembiba mapang Wadephul-i, iba tesem nung humanitarian tensa kanga mejungi lir ta ashiba den Israel dang teyari agütsüba lokti tentettem kecha tenokdangba magütsü yoktsü mepeshia liasü.

"Gaza nung aliba nüburtem yatzüra, asüba aser tekangshi ya anendaktsütsüla," ta pai ashiba den iba rara ya Hamas ajanga lir aser parnoki 2023 küm October ita pur aoba Israel nungertem chioktsüla ta ashi.

Israel aser Iran tayang kepzüktepa maktepba manener



Tehran, Aami/June 15 (Agencies): Israel aser Iran tsüngta Honibar aonung nungi Deobarnep tashi missile khaloktsütepa liasü aser tensa tamajungba kuma region nung rara tuluba akumtsü tetsübu aiter.

Israel sepaitemi Iran linük tesem balala nung civilian aser energy infrastructure nung bomb pokloksüba sülen Iran-ia rongnendak Haifa yimti densema Israel linük tesem balala nung tenük yoker missiles khaloktsü.

Deobarnep Israel indang mitkari Tehran nung Iranian defence ministry headquarters amak ta sangdong. Ajidang masü linük yimtiba nung Iranian regime indang nuclear nok-nü yangluba project dak sendaka aliba tesem aika amak ta ashi.

Item tesemtem ya Iran indang nuclear mangdang nung sendaktepa lir, ta Israel indang mitkari ashir, ajisüaka US

itdangiter aser International Atomic Energy Agency natibo Israel-i mamakdang Iran nung nuclear noknü yanglua meliasü, ta ashir.

Tamalen kodanga matalokba ataloka Israel armed forces temi 'Operation Rising Lion' nüngja agütsü Iran maka aonung tayimtsü amshia Iran indang nuclear aser military tesemtem amakba sülen tensa tamajungba akum. Tesüiba anogo ana tsüngta Israel-i amakba mapang nisung 80 shi tepsetogo aser 800 yirur lir, ta Iranian media ajanga ashir.

Israel-i amakba medena kuli agütsüba nung Iran indang nuclear programme ya 'point of no return' tatonger lir ta itdangiterba nungi sayur ta ashir. Tang Israel-i tayimtsü amshia Iran amakba ya Russia Tir Vladimir Putin-ia aitsüogo.

Israel-i amakba sülen US aser Iran tsüngta Deobarnü Oman nung nuclear ken o

jembitsü aliba thitsüogo.

Tsükchir linük ana tsüngta rara tenzüker anogo tasembuba nung air force-i Irannian Ministry of Defence indang headquarters aser nuclear project (SPND) indang headquarters densema Iran yimtiba Tehran nung tesem 80 dak tema amak, ta Israel mitkari ashi.

Hokulbarnü nungi iba rara tenzüker tang mezü ngbuba yimjak nung temai adoka Deobarnü jembidang, Israel-i amakba anenra Tehran-i tayang kepzü kba anentsü, ta Iran Foreign Minister Abbas Araghchi-i ashi.

"Tashiyim amshia anenra, onoki langzüba anentsü," ta Araghchi-i Tehran nung linük balala nungi lenirtem den senden ka amendang ashi.

Ajisüaka tang tashi Israel nungi telangzüba kecha mali aser tanen makai amaker.

Paisa Iran-i Islamic republic

linük amakba nung US sepaitemi yariba kuli Tehran ket nung lir ta ashi.

"Zionist regime military forces-i amakba nung region njng aliba America sepaitem aser American bases nung yariba kuli tejangja onok ket nung lir," ta Araghchi-i foreign diplomats dang ashi.

Kasa mapang US Tir Donald Trump-i Iran dang kecha yimya nunga United States mamaktsü amokmeren aser tashi mangara kodanga mongudangba yimya nung linük indang armed forces-i langzütsü ta Honibarnü (par mapang) ashi.

Israel-i Honibar aonung Iran amakba nung US kecha nunga shilem agia mali, anung Iran nungeri US ka makra timtem asütsü ta pai ashi.

Trump-isa ayong-ayonga Iran aser Israel tsüngta tezü ngzüktep ka yanglutettsü ta ashi.

"Taonung Iran dak amakba nung US teinyaktsü kecha mali. Iran-i onok dak yimya kar nung danga makra, US Armed Forces indang tashi nenoki kodanga mongudangba ajak nenok dang arutsü. Ajisüaka asenoki Iran aser Israel tsüngta tezü ngzüktep ka mela-mela yanglua iba azüdokshi tatem kati arudaktsütettsü," ta Trump-i pa indang Truth Social nung ashi.

Israel-i Iranian Defence Ministry headquarters, energy aser nuclear sites tem makogo ta shir ghonda ishika lir Trump-i iba sangdong ya agütsü.

Brehostibar aonung nungi tenzüka Iranian military aser

nuclear sites tem nung amaktsü lia Israel indang itdangiterba agency Mossad ajanga Iran telung nung operational base amenoka drones tem bendena liasü, ta Israel security ketdangsür kati ashi.

Osang ajanga ashiba agi, drones tem ya kanga jelia linük telungi shibelena ait aser amakba mapang amshi ta ashir.

"Amaktsü anasa aser Israel Air Forces ajanga amakba den kasa masü, Mossad-i yua aliba system activate asü," ta Haaretz dang osang ajanga ashi.

IDF ajanga noksa ka prokshiba nung Iran telung nung Brehostibar aonung menor amakba sayu. Ketdangsür temi ashiba agi tapoktsü oset bena aliba drones yagi Tehran anasa military base nung surface-tp-surface missile launchers amak.

Kasa mapang central Iran nung aliba Mossad commando units activate asü, kong parnoki Iranian air defences sites anasa moabu nung precision-guided weapon system yutsü.

Strike technologies ya Iranian territory telung nung aliba gari tem nunga inok, talisa surface-to-air missile systems kisü ng nung timtem agütsütsü asoshi amshi, ta osang ajanga ashi.

Item inyakyim ajanga amak tenzükdang Iranian defence systems okshia raksatsü, ta pai ashi.

Iran indang defence establishment nung lenirtem aser nuclear program tejangja metettsü asoshi IDF aser Mossad küm aika külemi inyaka aru, ta pai ashi.

NOA-i Olympic Day Run nung shilem agitsü tanurtem jaoker

Dimapur, Aami/June 15 (TYO): Nagaland Olympic Association (NOA)-i ayongzüka June 23 nü IG Stadium, Kohima nung Olympic Day amungtsü. Iba anogomung ya "Move, Learn, Discover - Together for a Better World" omen nung ajemdaker amungtsü.

Iba anogmung nung tongtibangtiba sentongji Olympic Day Run asütsü, koba tanur arishi küm 8 nungi 12 tsüngda alirtem atema ayongzüka track event ka lir aser iba ajanga Olympic tanüla ajungkettsü.

Ajak senteper tetoktepba balala atema sen lakh 1 senpet agütsütsü renema lir, aser iba ya atakzüka aliba arishi küm tsüngda alir tejangrara tanurtem ajak atema asütsü.

Olympic Day Run - Race Categories

- 50 meters - Tebur aser Tetsür (22/06/2015 - 22/06/2016 tsüngda asortem)
- 80 meters - Tebur aser Tetsür (22/06/2014 - 22/06/2015 tsüngda asortem)
- 80 meters - Tebur aser Tetsür (22/06/2013 - 22/06/2014 tsüngda asortem)
- 100 meters - Tebur aser Tetsür (22/06/2012 - 22/06/2013 tsüngda asortem)

Asaya ya June 23 nü IG Stadium, Kohima nung asayatsü aser asayartem anepdang 8 ako tashi nungbo adenshitsü metetdaksüogo.

Asaya nung shilem agitsü atema tenüng züngoksemtüsü asoshi May 31 nü tenzükogo aser tatembangbuba anogoji

June 17 asütsü.

Asaya nung shilem agitsü jangraratemi agüja aliba link nung QR code scan sütettsü mesüra NOA indang official social media handles tem semdanga züngoksemtettsü. Maneni NOA Office, Kohima nung offline form tem angutsü.

Osang tejangjaba agitsü atema iba number; 9362355375 nung tongteprateptsü metetdaksüogo.

Maneni asayamung ayongertemi tsürapur aser guardian tem dang iba asaya nung pei tanurtem shilem agidaksütsü aser parnok nongita yaritsü ayongzüko. Olympic Day Run ya asemtepba ka dang masü saka lanuwa, telongiem, health aser Olympic tanüla benjungba ka lir.

Guwahati nung India-New Zealand na T20I asayatsü

Guwahati, Aami/June 15 (Agencies): Taruba küm January ita India aser New Zealand na white-ball series ka asayaba mapang Guwahati nung T20I asaya ka ayongzüka asayatsü.

Link ana tsüngda asaya ti asayatsü aliba asayamung nung One Day Internationals asem aser T20 Internationals pongu asayatsü.

Asayamung ayongertemi Mohali, Jaipur, Indore, Rajkot, Hyderabad, Trivandrum, aser Nagpur nung tanungba asayatem asayatsü shimogo.

Ketdangsürtemi ashiba agi,

taruba asayatem ya ICC T20 World Cup 2026 atema renemshitsü asoshi kanga tongtibang asütsü, koba India aser Sri Lanka na nung February aser March asayatsü lir.

New Zealand den asayamung ya India team atema home season nung tatembangbuba asayamung asütsü. Iba masüdag India team West Indies den October ita Test ana asayatsü. Asayatem Ahmedabad aser New Delhi nung asayatsü.

T20 World Test champions

South Africa team India-i November aser December ita format ajak asayatsü atema arutsü.

Asayamung nung test ana (Kolkata aser Guwahati), ODI asem (Ranchi, Raipur, aser Visakhapatnam) aser T20Is pezü (Cuttack, New Chandigarh, Dharamsala, aser Lucknow) asayatsü.

India team West Indies aser South Africa na den kidang asayaba tom nung ano Australia nung oa October 19 nungi November 8 tashi ODI asem aser T20I pongu asayatsü lir.

BCCI-i 2025-26 domestic cricket season mapanglem sangdongogo

Aami/June 15, 2025 (Agencies): Board of Control for Cricket in India (BCCI)-i 2025-26 season atema domestic cricket mapanglem sangdongogo, kong group structures tasen benoka aser Asayamung format melenshiba densema lir.

Season ya 2025 küm August 28 nü nungi Duleep Trophy asaya tenzüksü, aser Senior Women's Inter-Zonal Multi-Day Trophy April 3, 2026 tashi asaya-a tembangtsü.

Taküm tongtibang temelenshi kaji Duleep Trophy aser Senior Women's Challenger Trophy atema zonal selections asüngsashiba asütsü aser national selector temi shimba squad masü saka zonal team trok asayatsü.

Limited overs asayamungtem nung tetoktepba jenjang ajungkettsü atema taoba season bongla nung tembangba team trok arishi küm tatakzü asayamung ajak nung Plate Group nung asayatsü. Promotion aser relegation inyakyima

melenshiogo aser season shia team ka dang Elite group-i atutsü aser team ka dang Plate group-i asepzüka alutsü.

Syed Mushtaq Ali Trophy aser Senior Women's T20 Trophy nung taoba mapang ama knockout phase masü saka Super League stage ka benoktsü. Vijay Hazare Trophy aser tanga tongtibang asayamungtem Elite Groups pezü aser Plate Group ka asayaba format ka benoktsü. Under-16, Under-19 aser Under-23 category nung Junior aser tetsür asayamungtem ajak five Elite plus one Plate group system sülen anidaksü.

Duleep Trophy August 28 nungi September 15 tashi asayatsü aser final ya Centre of Excellence, Bengaluru nung asayatsü.

Irani Cup Nagpur nung October 1 nungi 5 tashi asayatsü.

Ranji Trophy shilem ana küma lemsar asayatsü. Mezüngbuba shilem October 15 nungi November 19 tashi aser tanabuba shilem January

22 nungi February 1 tashi.

Syed Mushtaq Ali Trophy league asayatem November 26 nü tenzüksü aser December 8 nü Lucknow, Hyderabad, Ahmedabad aser Kolkata yimtitem nung tembangtsü. Knockout stage ya Indore nung December 12 nungi 18 tashi asayatsü.

Vijay Hazare Trophy league asaya December 24 nungi January 8 tashi Ahmedabad, Rajkot, Jaipur aser Bangalore nung asayatsü aser knockout asayatem January 12 nungi 18 tashi Centre of Excellence nung asayatsü.

BCCI-i tongtibang asayamung pezüprongla atema telok lemsaogo. Vidarbha, Tamil Nadu, Mumbai, Karnataka aser Delhi amala team tem Ranji Trophy, Syed Mushtaq Ali Trophy aser Vijay Hazare Trophy atema Elite category nung toktsüogo aser Meghalaya, Mizoram, Sikkim, Manipur aser Arunachal Pradesh nung Plate Group nung tokteptsü.

Mathys Tel, Tottenham Hotspur nung denogo



Aami/June 15, 2025

(Agencies): Bayern Munich nungi loan nung oa Tottenham Hotspur nung ita pezü asayaba sülen forward Mathys Tel, Tottenham nung teti atema denogo, ta club anapronglai Deobarnü metetdaksü.

France nunger Under-21 international asayar yagi Tottenham nungi 2031 tashi asayatsü atema tenangzüktepba ka yangluogo

aser media osang balala ajanga ashiba agi, pa pound million 30 shi agi alizüka liasü.

"Mathys Tel FC Bayern nung tanur asüba mapang aden aser idaki European football temaba jenjang nung mezüng jenjang agia liasü," ta Bayern indang head of sport, Max Eberl-i ashi. "Pa squad nung

ajaki sakloka liasü, shibai club aser team atema takokba tashi ajak agüja asayaogo.

Tottenham-i aoba ya pa asoshi tajangzüka liasü."

Arishi küm 20 tain Tel ya Stade Rennais nungi 2022 küm Bayern nung küm pezü atema aden aser taoba küm March ita 2029 tashi tenangzüktepba yanglushia liasü. Bayern nungi asayaba mapang pai asaya 33 nung asaya aser iba mapang goal trok idakja liasü, saka pa club nung jenjang junga meyangluteti liasü.

Pa February ita Tottenham-i loan nung ao aser asaya 20 nung asaya aser Europa League final nung Manchester United goal 1-0 agi akokba asaya nung pa densema liasü, koba Tottenham asoshi küm 17 tsüngda mezüngbuba takok marok liasü.

Coach tasenba Thomas Frank kübok Tel mezüngbuba alizükogo. Frank ya Brehostibarnü shima liasü.

INDIA OSANG :

Tapak 3 nungi...

Gaza bangzüng nung shilem magiba ...

Congress general secretary (Organisation) K.C. Venugopal-ia X ajanga, "Iba sorkar yagi Nehru senmang mezüngshir ta asenoki meteta lir, ajisüaka kechiba Palestine onük nung Vajpayee tangatetba-a sendoker?" ta asüngdang.

Party media & publicity department chairman Pawan Khara-i, "Alima sabang nung asenok ola a n g a s h i d a k t s ü n ü r a nüngdakba mapang nung asenoki tasü itta jembitsüla. Tim nung ola adokba ajanga asenoki tashi angur. Israel-i West Asia nung mi adokdaksür- bomb amshia

Gaza, West Bank, Lebanon, Syria, Yemen amaker aser tang Iran amaker. Modi-i ola madokba ajanga India nunger tangatetba sendokogo," ta metetdaksü.

Gaza nung telatetba kecha makai rara anentsü atema takhangba agüja bangzüng ka renema UNGA nung vote agütsütepba nung India-ibo shilem magi.

Züngsem linük 193 aliba UNGA nung Gaza atema renemba bangzüngji pusama vote agütsür linük 149 liasü aser iba bangzüng anema vote agütsür linük 12 dang liasü. India densema linük 19-ibo shilem magi.

BILEMDANGANG

"Tangar asoshi aliba taküm - ang taküm ali shizüka alir"